

EMEJENSI WONING LONG MOBAEL



Sapos i gat wan denja we i save spolem laef o helt o propeti blong yu, ol Emejensi Woning blong Mobael i save go long mobael blong yu. Yu no nid blong saenem wan pepa o daonlodem wan app.

Go long civildefence.govt.nz blong jek sapos mobael blong yu i save risivim kaen woning ya.

Sapos i gat wan bigfala denja we i save spolem laef o helt o propeti blong yu, wan Emejensi Woning blong Mobael i save go long mobael blong yu.

Ol woning ya oli yusum wan spesel teknik, mekem se yu no nid blong saenem wan pepa o daonlodem wan app. Mo tu oli save senem nomo long ol eria we denja i save afektem, mekem se bae yu kasem nomo sapos emejensi i stap long ples we yu stap long hem.

Ol grup ya nomo oli gat raet blong senem Emejensi Woning blong Mobael: Ministry of Civil Defence & Emergency Management, Civil Defence Emergency Management Group, NZ Police, Fire and Emergency New Zealand, Ministry of Health mo Ministry for Primary Industries.

Ol Emejensi Woning ya oli save kasem yu sapos fon blong yu i on, sapos hem i stret kaen blong risivim ol mesej olsem, mo sapos hem i stap insaed long eria we denja i save afektem. Go long civildefence.govt.nz blong faenemaot sapos fon blong yu i stret kaen.

Ol Emejensi Woning blong Mobael oli no tekem ples blong narakaen woning blong emejensi. Oli wan mo rod bakegen blong givim infomesen long yu. Tekem aksen kwiktaem. I no evri fon we i save kasem kaen woning ya, hemia nao sapos yu kasem wan, talemaot long ol man klosap long yu. Sapos yu harem se laef blong yu i stap long denja, yu no wet long ol ofisol woning.

Ol Emejensi Woning blong Mobael oli wok olsem wanem?

Ol Emejensi Woning blong Mobael oli yusum wan signol we hemi blong olgeta nomo, mekem se oli save kasem yu long taem blong emejensi we ol mesej long mobael fon mo intanet oli fulap, oli save blokem netwok.

Nomata wanem netwok yu stap long hem, eni fon i save risivim Emejensi Woning sapos hemi stret kaen mo hem i kam insaed long eria long taem we oli givimaot.

Mi save tekem desisen se mi no wandem risivim ol Emejensi Woning blong Mobael?

Nogat. Ol Emejensi Woning blong Mobael oli blong mekem se yu stap sef. Maet fon blong yu i gat sam difren kaen seting blong narafala kaontri, be long Niu Zilan bae mifala yusum wan spesol janel blong brodkas we hemi on oltaem.

Sapos mi risivim wan Emejensi Woning blong Mobael, bae mi mekem wanem?

Yu stop long wanem we yu stap mekem mo folem ol instraksen.

Ol bodi we oli gat raet blong wok long taem blong emejensi nomo oli save senem Ol Emejensi Woning blong Mobael. Oli save senem nomo sapos i gat wan bigfala denja long laef o helt o propeti (wetem wan o tu test mesej long wan yia). So sapos yu risivim wan woning yu mas ting hevi long hem mo tekem aksen we hem i talem.

Ol Emejensi Woning blong Mobael oli no tekem ples blong narakaen rod blong givim woning.

Emejensi Woning blong Mobael i wan rod blong mekem se yu stap sef long taem blong emejensi. Bae oli stap yusum iet ol narafala sistem olsem radio, TV, websaet mo sosel midia. Emejensi Woning blong Mobael i no tekem ples blong narafala sistem blong woning o blong nid blong tekem aksen folem ol najerol woning.

Yu mas pripea oltaem long emejensi. Yu no wet long wan woning i kasem yu bifo yu tekem aksen. Sapos yu harem se laef blong yu i stap long denja, yu no wet long wan ofisol woning. Tekem aksen kwiktaem.

Tekem taem blong mekem emejensi plan blong yu. Insaed long plan ya yu mas talemaot wanem blong mekem, wea ples blong go, hu i save helpem yu, mo hu i save nidim help blong yu. Yu save mekem wan plan long intanet long happens.nz.

Blong faenemaot mo infomesen long saed long Emejensi Woning blong Mobael, go long civildefence.govt.nz.

